

KUMPUAN
RAM LEH HNAM
HUMHALH

YMA AW



CHANMARI WEST BRANCH YMA CHANCHINBU KARTIN CHHUAK. VOL. XXIV. ISSUE NO.37 15th September 2013

YMA Park kaltlangin Jeepable kawng sial dawn

Branch News

Chanmari West, 15th September, 2013 : Ni 10.9.2013 (Thawhlejni) chawhnu khan Pu VL. Thakima inah Branch Executive meeting a ni a, he meeting hi Pu C. Lalzarliana Branch President chuan a kaihruai a ni.

YMA Park kaltlanga Jeepable kawng sial tlangna tur AMC atangin hmuh a ni a, he kawng hi Pu Tenga (L) in bul atanga tanin YMA Zawlbuk thleng tur a ni a, remchang a la awm chuan YMA Zawlbuk atanga hian Central Road thleng sial leh tum a ni. He kawng sial a nih theihna atana hma latu AMC Councillor Pi Zamanthangi chungah Branch YMA chu a lawm hle a ni. Hemi atana hma la tur hian working committee din a ni a, Chairman Pu C. Lalzarliana, Vice Chairman Pu Lalrinliana, Secretary Pu K. Darthangluanga, work manager Pu TC. Lalmangaiha te niin, member dangte chu Branch OB la bang leh Section tin leaderte an ni.

Central YMA in Ramhlun vengthar leh Ramhlun Sport Complex-a leimin tuarte tan tanpuina pe tura min ngen angin Rs 3000.00 pek a ni.

Thlanmuala tui connection chu lak fel a ni a, sintex lian pawh dah thuai tum a ni bawh, thlan siamte tan tangkai hle tura ngaih a ni. Tui

connection neih theih nana hma latu Pi Zamanthangi chungah Branch YMA a lawm hle.

Kumin Krismasah hian veng chung chei nise tih a ni a, section hrang hrangten mahni section theuh chei tura beisei an ni a, hemi a tana hman tur hi a tul anga veng nu leh pate hnena pawisa pawh khawn tum a ni.

Pu C. Lalzarliana Branch YMA president chuan Portable mike tha tak mai Branch YMA ah a pe a, a chungah an lawm hle. Kan veng chungah chhiat tawh chungten ruang tuamna Branch YMA a an rawn pek thin chu a tam tham deuh avangin Section tinah panga zela sem darh tur tih a ni a, Branch Secretary-in sawm kawh bawh se, tin Synod Hospital leh Aizawl Civil Hospital-ah sawmhni ve ve a tul anga an hman pek bawh nise tih a ni.

Lumen zan leh YMA programme hman tur Combo thar tha tak lei rum a ni a, hma la turin Pu K. Lalthakima ruat a ni.

Ni 10.9.2013 Thawhlejni tlai khan Executive Member Pu VL Thakimate inah Branch Executive meeting tum 12-na thut a ni a, pawisa thawh khawmin zanriah kilho nghal a ni, hneh taka thlengtu Executive member Pu VL Thakimate chhungkaw chungah Branch YMA in lawmthu a sawi.

Ni 12.9.2013 Ningani a Central Coordination Committee(CCC) meeting Tuikhuatlanga CYMA Hall-a neihah Vice President Pu K. Darthantluanga CEC leh Branch aiawhin Treasurer Pu R. Lalmachuanate an tel.

Ni 12.9.2013 Ningani zing khan Kawng kawipui CH-Sect. Pu Vanlalnema inhnuai State Bank of India ATM hawna Local Council kaihhruainaa neihah Branch hruaitute tel a ni.

Ni 12.9.2013 Ningani zing khan Pu Thanmawia inbul V-Sect. a Ramlai Welfare ten MP Fund atanga Flying step an siam mek tha tawh lo chu Local Council leh Branch hruaituten enho a ni a, siam tha leh turin hnathawktute hriattir an ni.

11th Chief Ministers' Running Trophy in YMA Cultural Dance Competition 2013-a lawmman pahniha Branch YMA in a lak lawmpui nan bialtu MLA hnen atangin Rs.3000 dawn a ni.

Ni 13.9.2013 Zirtawpna Executive member R. Lalrinngetha leh K. Vanlalchhuangi te Presbyterian Kohhran Biak ina Dan thianghlina an innei chu Branch YMA in a chhuangin a lawmpui hle a, fanau maltluan chawia lengdun turin duhsakna a hlan.



Ni 13.9.2013 khan kan Editor R. Lalrinngetha leh K. Vanlalchhuangi te chu Chanmari West Presbyterian Biak Inah Kohhran Dan thianghlina an innei a, Editorial Board ten kan lawmpui hle.

(Pic : Editorial Board leh tuak tharte)



TUNKAR CHANGVAWN

Leilung luah zawng zawngte u,
Pathian chawimawiin hlim takin au
ula, A hming ropui zia chu hlain sa
chhuak ula, A fakna chu tiropui
rawh u.

Sam 66 : 1,2

Editorial Board

Editor:	RLalringheta	9862358337
Joint Editor :	Lalchhandama	9862358347
	JLalnangliana	9862399658
News Editor :	Thangkuma	9862303135
	Lalchuanmawia	9862580558
	KLalremtuanga	9862119608
Cir.Manager :	Jacob Lalrinsanga	9612319779
Production Manager :		
	RL Thanhmuna	9436152760

Branch Office Bearer

President	C Lalarliana	9436142049
Vice President	K Darthantluanga	9436196071
Secretary	Zairemmawia	9862385654
Asst. Secretary	RL Thanhnuna	9436152760
Treasurer	R. Lalmachhuana	9436151817
Fin.Secretary	Lalrinliana	9862581814
Adviser-te :	Pu F Zosanga	9436142106
	Pu A Biaklawma	9436363169
	Pu Lalrengpuia Sailo	9862075614

Editorial :

Kar kalta chhungin kan Board chhungah lawmna thil a thleng a, tun tum YMAAW buatsaih pawh kan hlim tlang hle.

Kan Branch chuan hmalakna tur lian tha tak mai kan nei thar leh a, YMA Park kaltlangin kawng kan sial dawn a ni a, he kawng hi kan veng tana pawimawh em em mai a ni a, chuvang chuan veng mipui tawiamna kan mamawh hle a ni, i tangrual ang u.

Hetih lai hian kan veng chhungah hna chi hrang hrang thawh mek zel a ni a, heng kan veng tana thawktute hian veng tan a ni tih hriain, a tha thei ang berin thawk thi se a duhawm hle. Ramlai Welfare hnathawh pawh hian duhthu a sam lo va, siamtha tur ngen an ni a, anni pawh hian an siam that ngei beisei ila, hetiang ang sum tam tham hi chu hmuh leh mai mai a harsat avangin kan hmuh chhun hi a tha thei ang berin hman ngei a duhawm hle a ni.

Kan veng YMA te zaipawl leh hnam lamah kan buai malh malh a, tunah chuan a rah kan hmu ta a, hnam lamah phei chuan lawmman pahnhna ram pumah kan ni a, a lawmawm hle a ni. Hetiang dinhmun tha kan luah theihna hi kan veng kan tanrualna vang a ni a, kan chhonzawm zel pawh a tha hle ang.

Chhiatthat thuah pawh kan memberte inpekna hi a fakawm hle a, amah-erawhchu hmasawn zel tur kan nih avangin member zawng zawngtan tan la thar zel ang u.

Article**Minute 36-a Rs vbc 274 hlawh tur Mayweather ni ta ila**

T-a

Floyd Mayweather Junior ni ta ila, India sanaa tukin zing dar kaw bawr velah hian Saul "Canelo" Alvarez nen MGM Grand Garden, Las Vegas-ah WBC leh WBA super welterweight title inchuhin kan inhnek ang. Round 12 inbei tur kan ni a, ka knockout lo emaw min knockout lo emaw a nih chuan minute 36 chhung kan inbei dawn tihna a ni.

Ka hlutna a sang vet vet bawk a, tun tumah hian a tlem berah Rs vaibelchhe 274 vel i hlawh dawn a, pay-per-view kan hralh that viau chuan chanvo i nei tel bawk dawn nia an la ti cheu va, "Ni e," ka ti ve hram. Kei aiin ka hlawh turah hian contract min ziahpuitu Showtime an lawm zawk mahin ka hria.

Hlawh chhe lutukah ka inngai lem lo va, a chhan chu second khatah Rs nuai 12 chuang la lut thei tura min thlem miao avangin "Nia maw le" tiin ka chhang a, inti theihna tham vakah pawh ka ngai hran lo. Hei aia sang hi hlawh dawn pawh ni ila thil mak a ni lo va, mahse, mi dangten ka hlawh chanve hi ka hun hman angah hian an la lut dawn a nih chuan miten mak tiin hahipin an sawi thung ang maw le !

Kei chu khawvela tha ber ka ni a, boxer zawng zawng zinga thawkrim ber ka ni bawk a, ka thiamna siam lian tura ka beih nasatzia ka hria; chumi piah lamah miten ka inhnek an en chakna tur leh khawvel mit la ka nih theih nan mi tih duh loh tam tak hmangin mipui rilru ka tizauthau thin.

Ka hnek turte tawngkam awmze nei leh ngeiawm, chimawm taka han sawisakte hi ka hmanraw tangkai a ni. Puipunnaah mi pangngaiin an tih duh si loh; langsar larhna tura nunchang dangdai tak lantirte hi thil tangkai a ni a, mawl min ti viau mah se ka finzia an hrethiam lo va, ka inhnek en chak hlei hlei an ni. Night club-a dollar 100 (Rs 6600 vel) note han hal ral velte hi thil nuam ve tak a ni.

Khawvela car man to 10 chuang ka kawh kawm avang hian tu nge mawl min ti a, ka car pakhat pawh lei zo lote hian " Mi A" min ti ang maw ? Ka bialnu hlui kut ka thlak avang leh min vengtu ka sawisak avangin danin thiam loh min chantir a, lung inah hial min khung. Thil mawi leh tha a ni lo Chiang hle tih ka pawm.

Mahse, tan in atanga ka chhuah hnuaah ka hlutna a pung hle si a, lung in atanga ka

chhuah atangin wavi khat ka inhnekah Rs vaibelchhe 200 chuang ka hlawh ziah theih chuan thil tha a ni em em dawn lo em ni ? NLUP la ve lo mah ila, ka vui lo.

Khawvel boxer piang chhuak tawh zinga inven thiam ber ka ni a, ka ran em avang leh ka thiam luat tuar lovin professional ka luhchilh atanga mi 44 ka hnek tawh ka la hneh vek. A dawzep, a inhnek dan a hmuhawm loh tiin min sawisel thin a, min demtute hi ka inhnek apianga en chak an ni ziah. A ni telin khawvelah hian min ngaisangtu leh ka inhnek en chak an pung zel a, ka sum lak luh tihtlem tum ngial pawh ni ila ka thuneihna piah lam a ni tlat a, tih ngaihna ka hre ngang lo.

Kum 36 mi Mayweather hi chu ni ngat ila, kan branch YMA Zawlbuk sak puitlinna tur mai ni lovin, Aizawlah pawh chhuan tham larh a nih theih nan kan hruaitute hnenah sum ka pek phal mai ka inring a, mahse, a takin ka kutah sum awm ta se ka phal ngut ang em maw ?

A chhan chu MLA inthlan dawna kan Zawlbuk sak puitlinsak min tiamtute khan an ti tak tak niin ka hria a, an thusawi laite pawh ka mitthlaah a lang uar uar mai. Tun thlengin kan hruaituten thi leh thau pawlhin an bei a, mut mawh hnar mawhah neiin kan veng rotling ni tur buaipuiin an la vir buai em em si.

Kei pawh ka pe ang che u ti ve ngawt ila, ka pek leh phal si loh chuan... ! Bible-ah thutiama hlen loh ai chuan tiam loh law law a tha zawk tihte hi inziak lo law law se chuan a ziamw deuh mah na ?

Tichuan, second chanve vel chhunga ka hlawh tur pawh Mizoram Premier League khel tura inbuatsaih mek Chanmari West Football Club tan "Pain a fapa chithlum mum a leisak ang velin" han sih chhuah ila, Chanmari West FC team enkawltute chu an va lawm dawn em tihte thlengin ka rilruah a awm a, a lungchhiatthlak zawnga ngaihtuah pawhin a dawngtu tan chuan lawmawm tham deuh tur a ni.

Mite nen kan hlawh a inthlauhzia aiin mumang ram leh duhthusam pawh duhtawk lo va, suangtuahna nen tangkawpa vanram nawm turzia aia leia ka nawmsakna leh ropuina tur ringawt ka ngaihtuah laiin, Mayweather leh kum 23 mi Alvarez-te inhnek hun chu a hma aiin a lo hnai hle tawh zawk a.

Chawngbawla Section

- ☐ An hruaitu lo ni reng thin H V Lalremruata (Angcha-a) chuan Ni 12.9.13 ningani khan nupui a neia, an lawmpui hle.
- ☐ Pu PC Lalmalsawma leh Pu Lalremsanga Tlau te chuan fanu duhawm tak an nei a, R Lalchawimawia chuan fapa duhawm tak a nei bawk a an lawmpui hle.
- ☐ Pu C Laldawngliana'n Section Microphone min siam that sak a, a chungah lawmthu an sawi.
- ☐ Kar hmasa chhuak a tui chhawpna Donate tute kha Pu K Lalramhlunate chung tih zawk tur a ni e.
- ☐ Khawlai a ui chhuak hmuhtur a tam hle mai a ui neitute chhuah lo turin an in hriattir. Section hruaitute ui leh ar chhuak chek tura lo inring reng turin an in hriattir.

Khuangchera Section

- ☐ Ex-officio member K Vanlalchhuangi'n kawppui tha tak a nei ta chu an lawmpui hle.
- ☐ Industry Department hnuaiiah NLUP dawngte Name Plate siamin hruaitu hnatlang ni 7/9/2013 leh ni 12/9/13 khan neih a ni a. Inhlawhna hmuhsaktu NI H. Vanlalhruaii leh NI Lalmuanpuii te chung ah lawmthu an sawi.
- ☐ Section huamchhung atanga YMA General Conference 2013, Khawbung a kal tumte chuan Secretary hnenah September thla chhungin in hriattir tur a ni. YMA member atam thei angber kal turin an inngen.
- ☐ An hruaitu pahnih Pu HV Lalthavela leh Tv David Malsawmkima te hna lam thil avanga zin ve ve pawh dam takin anlo haw leh ta.
- ☐ Silver Jubilee Fund chungtin ah khawn zawh thawkhat a ni a. La pe tlalo te chuan ngai pawimawh turin an inngen.

Neuva Section

- ☐ Bungrua hawh tur reng rengin bungrua hman hun ni hma a dilna (Proerty Incharge hmingin) felfai tak siam a theh luh hmasak phawt thin tur a ni. Bungraw hawh dilna siam lo te chuan bungrua an hawh chhuak theilo ang. Bungrua reng reng ten fai tak a dah thintur, Receipt ken tel thin bawk tur.
- ☐ Chhiattawk an awmin Mitthi lu-

men, khawhar in kal leh thlanlah te hi Member ten kan tih tur aniah ngaiin kal theuh tur leh tan la sauh sauh turin an in chah.

- ☐ Chhungtinte mahni in leh a vel vawngfai theuh turin an in chah.
- ☐ Ui leh ar vulh tu te an ran vulh te khuahkhirh tha turin an in hriattir.
- ☐ YMA AW Editor in Nupui tha tak a nei chu an lawmpui hle. Fanau maltuan chawia hlimtaka Kristian chhungkaw tha tak an din zel theihna atan duhsakna an hlan.
- ☐ An member NI Laltlanhlu d/o Lalremruata Hauzel in M.Sc (Botany) 1st Div ah a pass chu an lawmpui hle.
- ☐ Kawngpui dunga Ui inthiar tir tawh lo turin an in hriattir.

Taitesena Section

- ☐ Ni 12. 9. 2013 (Ninga) zan khan Section Committee an thu a, thu pawimawh tak tak an rel.
- ☐ Ni 14.9.2013(Inrinni) khan KUANG DUAN HNATLANG an nei a, workshop hman tirtu Pu Lalngaihawma chungah lawmthu an sawi
- ☐ Mitthi Buhfai khawn tur leh YMA AW sem tur an ruat thar.
- ☐ Member-te activities hrang hrangah thahnem ngai leh zual turin an inchah nawn leh a ni.
- ☐ An hruaitu Pu Zoramthara, a pu in a boral san avangin an tawrhpu tak zet a ni.
- ☐ Section Chhiatni Fund khumna chu ₹2100 a ni.
- ☐ Silver jubilee Fund khawn tawh

Vanapa Section

- ☐ An Secretary Pu PC Lalawmawia'n fanu duhawm tak a nei an lawmpui hle.
- ☐ An hruaitu TV R. Lalrinnggheta'n kawppui tha tak a nei chu an lawmpui tak zet.
- ☐ Juliet Lalengkimi'n Arm Wrestling-ah Gold Medal a la chu an chhuang tak zet a ni.
- ☐ Section chhung kawr velah bawlhhlawh paih mai mai lo turin an inngen.
- ☐ Section chhunga ran vulhten ran khuahkhirh theuh turin an ngen.

AWM THAR

Pu Lalmuana te chhung member 3, Hunthar veng atangin Pu J.Johana in N-Sect. ah.

✚ Kan Then Tak ✚

R. THANGDAILOVA

Pu R. Thangdailova hi Upa Rela leh Pi Chhungteite fa naupang ber a ni a, May 2, 1936 khan Nisapui kuaah a piang a ni. May 11, 1960 khan Pi Thangkungi nen an innei a, fa 8 an nei a ni.



Rambuai vangin Aizawlah a pem a, Aizawl a luh tirh hian Agriculture Department-ah IV Grade hna a hmu a; mahse, an chhangchhiat leh a rual em avangin IV Grade hna mai chuan inchawm zo dawnin a hre lo va, a bansan leh ta zawk a ni. Tichuan Manipur leh Cachar-ah te Bawngkaiin a sumdawng ta zawk a ni.

Taima rum rut leh Pathian ring flat mai mi a ni a, khawtlang tan pawh phak ang tawka inhman thin a ni a, Chanmari West VC hmasa ber kum 1987-ah pawh khan member a ni a, MUP ah pawh OB post hrang hrang a chelh tawh a ni.

Kum 2012 June khan Biak in bulah a tluin a khup kawei a sawh keh a, hritlang awmna ten tlakbuakin TB a ni tih hmuhchhuah a ni a, Ni 9.9.2013 tlai dar 3:00 khan chatuan ram a pan ta a ni.

ATM HAWNANI

Ni 12.9.2013 zing dar 7:00 khan Kawng Kawipua Pu Vanlalhnema building a mi ATM chu Pu Laldingliana IFS (Retd) Chief Information Commisioner chuan a hawng.

Hawna inkhawm hi Pu R, Rokima inah hman a ni a, Pu F. Zosanga Chairman Local Council chuan a kaihruai a ni. Pu Lalthuamliaana Regional manager chuan report tlangpui a pe a, Pu RK Pahlira President Chanmari West Pensioner Associationin lawmthu a sawi a, thingpui tui tak inho nghal a ni bawk.

ATM hi Aizawl vengah pawh tlemte chauh a la awm a, Pensioner hmalakna avanga ATM hi kan vengah dah a ni. ATM kan vengah awm hi veng mipuiten dimdawi taka hman a, venhim a tul hunah pawh veng himtu turte kan ni theuh tih i hria ang u.

CONFERENCE - 2013 KAL DUH TAN

Kum 2013 YMA General Conference October ni 15 - 17 chhunga Khawbunga neih tura Chanmari West Branch YMA member kal duh turte chuan September thla ralhmain Branch Secretary Tv Zairemmawia emaw mahni awmna section Secretary hnenah hming pek luh tur a ni e.

ZOFA

☐ Ni 13/9/2013 zirtawpni khan an Asst. Secretary Tv R Lalrinnggheta chuan nupui atan NI K Vanlalchhuangi chu a nei a. Zofa Cultural Club chuan kan lawmpui hle.

☐ An member mi 10 te Ni 11-13/9/2013 chhung khan Serchhip ah PIB Programme hmangin an kal a, programme thatak neiin tuangtakin Aizawl anlo thleng.

☐ Ni 21/9/2013 inrinni khian Reiek ah Anthuriam Festivalhmang turin an in buatsaih mek.

☐ An Treasurer damlohna thila phai zin pawh damtakin alo thleng leh ta.

VOTER ID LAM THEIH

Pu C. Lalmuankima BLO hnenah heng mite hian ID Card lam theih a ni e :- 1. Ramdinmawia s/o Pawlthanga, 2. Zodinthari d/o Lalramsiami, 3. Lalawmpui d/o Zodinsanga, 4. Lalhmingthanmawii d/o RL. Malsawma. BLO dangte hnenah pawh ID Card hi lam theih tawh a ni e.

CMS' Running Trophy Cultural Dance-a lawmman pahnihna lak lawm dawn

Ni 17.9.2013 Thawhlehi tlai hian CMS' Running Trophy hnam lam intihsiaka Chanmari West Branch YMA in lawmman pahnihna a lak chu a lawmna YMA Zawlbukah neih tum a ni a, intihsiaka tel member zawng zawngte, Organizing Committee, Instructor/instructress, Branch hruaitute leh Adviser te tlai dar 5 ah kintaka tel theuh tura hriattir in ni.

He hun hi veng pum huapa lawm a that viau laiin eng emaw remchan zawkna avangin zim deuh zawkin hetiang hian ruahman a ni.

CWSC

☐ Lunghlu Road a hand railong hna an thawh chu an zo fel ta a, Work Manager Pu Zonunsanga (Patea) K Section chungah lawmthu an sawi.

☐ Vengchhunga bawlhhlawh paih man (PPP Mode) an rawn khawn dawn a, chhungtinte lo pe theuh turin an inngen. Khawn phalna petu Local Council chungah lawmthu an sawi.

☐ Indoor Stadium extension & renovation tura hmalak mek a ni a, Plan & Estimate siam saktu Pu Saitluanga Sailo hnenah lawmthu an sawi.

☐ MVA Volleyball Indoor Championship khelh mek a ni a. MLP Oct ni 3 atanga khel turin an inbuatsaih mek bawk.

☐ Vengchhung chhungkaw tinah vehbur (Donation) an rawn khawn dawn a, lo tanpui theuh turin an inngen.

CWSC VOLLEYBALL

☐ Ni 11.9.13 Nilaini atang khan Tuikual Indoor ah 1st Div League khelin Electric Veng leh TNT Volleyball Team an hneh. Thawhtanni hian 2nd IR an khel leh ang. Vengchhung mi atam thei angber tawiawm turin an ngen.

☐ Tournament khelh laia thingpui in man tumsaktu Pu RK Rozidinga T-Sect leh Pu Liantea T-Sect te chungah lawmthu an sawi.

☐ Player-te eisial saktu leh kalna motor hmantirtu Pu Lalduhawma T-Sect chungah lawmthu an sawi takzet a ni.

BADMINTON CLUB

☐ Tunlai inkhel kan tlahniam deuh hlek a, memberte tanla deuh turin an in ngen.

☐ September thla chhunga Coaching neih antum chu Sport Department lam a Coach an indaihloh avangin thulh rih a ni.

MHIP

☐ Tailoring / Handloom Kendra te chu ni 23.9.2013 leh 24/9/2013 hian exam neihtur a ni.

☐ Tailoring / Handloom Kendra kum 2013 2nd batch atan Instructress a dil theih leh ta a. Ni 16/9/2013 atanga ni 27.9.2013 inkar hian dilna President/ Secretary MHIP hnenah thehluh theih a ni. Ni 28.9.2013 dar 1:00pm hian MHIP Buildingah interview tur a ni.

BPL Member te hriattirna

Aizawl City Project, SJSRY hnuiaia Step-up Training 2nd Session chu 1st October 2013 hian tan a ni leh dawn a, heng a hnuiaia Trade hrang hrang te hi dil theih a ni dawn a, BPL member dil duh chuan Dt. 17 Sept. 2013 ral hma ngeiin Secretary hnenah in report tur a ni ang.

1. Tailoring (Men or Women) 6 months
2. handloom 6 months
3. Computer 6 months
4. Computer Hardware 6 months
5. Catering & Food Processing 6 months
6. Electronic 6 months
7. Beaty Culture 6 months
8. Carpentry 6 months
9. Knitting 6 months
10. Computer Aided Designing 6 month (Class VIII Computer thiam)
11. Female Attendant 6 months (Class VIII chin tan)
12. Broom Making 3 months
13. Security Guard 6 months (Class VIII chin)
14. Two Wheeler Repairing 3 months
15. Mobile Handset Repairing 3 months
16. Hair Cutting (Mipa lumeh) 3 months
17. Dry Flower Making 3 months
18. Motor Driving 2 months

GAS CARD LAM TUR

Lalremruara, Rohmingliana, Lalthanpari te hian an gas card Pu H.Lalramhluna T-Section hnenah lam tur a ni.

IFA KHAN A ZIRLAIAH HENGTE HI A TLACHHAM EM?

Self-Confident, Imagination, Creativity, Concentration, Memory, Listening Skills, analysis, Speed and Accuracy, Mathematics a hlau em? Aloha hmangin kan lo lanpui ang che. Inrinni (Saturday)-ah chauh Learning Centre, Bazar Bungkaw (Main Centre)-ah Class neihpui an ni. Admission a tih leh theih ta.

Hrechiang duh tan.

Phone - 2301870 (O)

9612820756/9862577316 (3-3)